

Inisiatif tingkat pelbagai peluang ekonomi digital

Pelan tindakan memiliki tiga objektif, enam teras dan 22 strategi

Kuala Lumpur: MyDIGITAL dan Rangka Tindakan Ekonomi Digital Malaysia akan membantu mengoptimalkan peluang digital yang wujud merentas masyarakat, perniagaan dan kerajaan.

Pelan tindakan itu yang diumumkan kerajaan memiliki tiga objektif, enam teras dan 22 strategi membabitkan 48 inisiatif nasional dan 28 inisiatif peringkat sektor.

ia berpandukan tiga prinsip panduan iaitu inklusiviti dengan memastikan tiada sesiapa yang tertinggal kesan daripada digitalisasi etika iaitu memastikan data dan peralatan digital digunakan secara beretika dan kepercayaan, di mana untuk memastikan pertumbuhan ekonomi digital tanpa mengabaikan keselamatan serta keselamatan siber.

Selain itu, ia turut memiliki tiga objektif dasar iaitu pertama, menggalakkan pemain industri menjadi pencipta, pengguna dan yang menerima guna model perniagaan inovatif di bawah ekonomi digital.

Kedua, ia dijangka memanfaatkan modal insan yang boleh berjaya dalam ekonomi digital dan ketiga pula adalah mewujudkan ekosistem yang bersepadu bagi membolehkan masyarakat menguasai ekonomi digital.

Rangka tindakan itu juga menggariskan enam teras untuk menyokong objektif dan visi iaitu memacu transformasi digital



sektor awam, meningkatkan daya saing ekonomi melalui pendigitalan, membina infrastruktur digital yang menyokong, membangunkan bakat digital yang tangkas dan kompeten, mewujudkan masyarakat digital inklusif serta membina persekitaran digital yang dipercayai, selamat dan beretika.

Peranan sektor, awam (kerajaan), sektor swasta (perniagaan) dan pertubuhan masyarakat sivil (masyarakat) saling melengkapi dalam mencapai visi dan objektif yang digariskan dalam rangka tindakan itu.

Kerajaan memainkan peranan penting sebagai pemboleh daya dalam mentransformasi negara dengan menetapkan hala tuju, memudah cara inisiatif serta menggalakkan perniagaan dan masyarakat untuk menguasai teknologi digital.

Sektor swasta pula digalakkan memanfaatkan platform, ekosistem dan pasaran digital dalam

aktiviti serta bekerjasama dengan sektor awam dan pertumbuhan masyarakat sivil (CSO) dalam model perkongsian baharu.

Adalah penting bagi sektor swasta untuk meneraju pendekatan yang bertanggungjawab dan mampan dalam menyediakan produk dan perkhidmatan serta mencipta bersama penyelesaian inovatif untuk mewujudkan impak sosial dan alam sekitar yang positif.

Selain itu, MyDIGITAL juga disasar membina persekitaran digital yang dipercayai, selamat dan beretika membabitkan bukan sahaja perkakasan tetapi juga rakyat dan institusi.

Menerusi Rangka Tindakan Ekonomi Digital Malaysia yang dilancarkan kerajaan, ia membolehkan perniagaan dan masyarakat memanfaatkan sepenuhnya perkhidmatan digital tanpa mengabaikan aspek keselamatan, perlindungan data, kerah-

siaan, daya harap dan standard etika.

Persekitaran digital memerlukan pembangunan ekosistem yang menyeluruh seperti rangka kerja kawal selia dan keupayaan keselamatan siber untuk menangani ancaman atau ketidakpatuhan yang boleh menjejaskan ekonomi digital daripada berfungsi sepenuhnya.

Selaras dengan perkembangan penguasaan ekonomi digital di Malaysia, ancaman keselamatan siber semakin meningkat dengan bertambahnya penjanaan, pertukaran dan penggunaan data oleh pengguna.

Dengan kelebihan dalam rangka kerja institusi yang dimiliki, Malaysia sudah mengambil langkah proaktif untuk memperkuh ekosistem keselamatan siber.

Kejayaan langkah ini dibuktikan dalam pencapaian ITU Global Cybersecurity Index, iaitu Malaysia secara konsisten berada dalam kalangan 10 negara teratas di dunia bagi komitmen keselamatan siber sejak tahun 2014.

Selain itu, Malaysia berada pada kedudukan kedua selepas Singapura di rantau Asia Pasifik pada tahun 2018.

Tahap kesedaran mengenai kepentingan keselamatan di ruang siber masih menjadi cabaran dalam kalangan rakyat dan perniagaan terutama perusahaan mikro, kecil dan sederhana (PMKS), selain kepercayaan rakyat terhadap integriti organisasi yang memproses dan menggunakan data peribadi juga masih rendah.

Penggunaan teknologi digital juga meningkatkan kebimbangan mengenai etika.

Selain itu, kekangan kewangan yang dihadapi oleh PMKS menghalang penggunaan peralatan keselamatan siber secara meluas.